

destillirt jhn wieder wie zuvor davon/ solches Auff- vnd Abgiessen sol man sechs mal thun/ hernach sol man das Glas in den Sand setzen/ vnd den spiritum vini halb davon ziehen/ vnd nichts mehr/ denn sonst würde der Zucker verbrennen/ denn man muß das Feuer so stark machen/ daß der spiritus vini mit dem Zucker in dem Glase siedet/ denn die verbrennliche Olie ist noch bey dem Zucker.

Dieses Auff- vnd Abdestilliren sol man so oft wiederholen/ bis man sieht/ daß der Zucker so roth wie ein Blut worden/ geschicht ungefähr in vier Tagen und Nächten/ nachdem man wol gearbeitet hat.

Andere pflegen ein Circulir-Glas zu gebrauchen/ damit der abgestiegene Spiritus alsbald wiederumb aus dem Zucker falle/ hernach sol man in balneo den spiritum vini linde davon ziehen/ denn ein destillirt Regen-Wasser darüber gießen/ vnd ein gut Theil in balneo mit einander solviren lassen/ so scheiden sich endlich die feces von dem zubereiteten Zucker/ denn sein innerstes ist nun herausgewandt/ alsdenn mag man seine feces von ihm bringen.

Vnd also ist es mit allen Dingen bewandt/wenn man dieselbe auff das allerhöchste reinigen wil/ so sol man seine innersten feces davon scheiden.

Nun sol man dieses Wasser abgießen/ vnd filtrirn, welches denn eine schöne Röthe bey sich hat/ dasselbige sol man in balneo lind davon destilliren/ vnd denn wieder darauff gießen.

Wenn es nun keine feces mehr setzt/ sol man das Wasser lind davon destilliren/ bis oben eine Haut erscheinet/ dasselbe sol man hernach vierzehn Tage in einen Keller setzen/ so schiessen Crystallen ganz roth wie ein Rubin/ so ist alsdenn diese Medicin bereitet/ vnd hat Quintam Essentiam vom Zucker/ die alle flüchtigen Geister bey sich behält/ vnd coagulirt, vnd so man ein wenig davon in den Mund nime/ so hat es einen himmlischen Geschmack/ keinem andern zuvergleichen/ davon auch Isaac Hollandus schreibt/ legt auch dieser Essentia viel Kraft zu/ daß sie sol die erkalten Naturen erwärmen/ vnd die alten abgematteten Personen stärken sie noch eine gute Zeit aufzuhalten/ welche sonst Abkraft halber wol sterben müssten.

Diese